

საქართველოს ახალგაზრდა იურისტთა ასოციაცია GEORGIAN YOUNG LAWYERS' ASSOCIATION



საიას განცხადება გიგი უგულავას საქმის განხილვის განმეორებით დაუსაბუთებლად გადადების შესახებ

როგორც ცნობილია, თბილისის ყოფილი მერის, გიგი უგულავას ბრალდების სისხლის სამართლის საქმეზე 2014 წლის 10 ივნისს ჩანიშნული სასამართლო სხდომა, სადაც სასამართლოს უნდა ემსჯელა მისთვის შეწყვეტილი ქალაქის მერის უფლებამოსილების აღდგენის საკითხზე, ბრალდების მხარის გამოუცხადებლობის მოტივით, კიდევ ერთხელ გადაიდო. მანამდე იმავე მოტივით გადაიდო 5 ივნისს ჩანიშნული სხდომაც. სახელმწიფო ბრალდების განცხადებით, რომელსაც ოთხი პროკურორი წარმოადგენს, სხდომაზე გამოუცხადებლობა განპირობებული იყო პროკურორების მივლინებით ბათუმში, სადაც

ისინი ესწრებიან სემინარს კიბერდანამაულის შესახებ და ამასთან, უზრუნველყოფენ სახელმწიფო ბრალდების მხარდაჭერას ერთ-ერთ სისხლის სამართლის საქმეზე. სასამართლომ ბრალდების მხარის დასწრების გარეშე შუამდგომლობის განხილვა მიზანშეწონილად არ მიიჩნია, შესაბამისად, სხდომის განხილვა გადადო.

საქართველოს ახალგაზრდა იურისტთა ასოციაციას მიაჩნია, რომ მოცემულ სისხლის სამართლის საქმეზე სხდომის გადადება არ გამომდინარეობს კანონიდან და სავარაუდოდ მიზნად ისახავს საქმის განხილვის გაჭიანურებას.

კანონით, სასამართლო სხდომის გადადება შესაძლებელია მხოლოდ საპატიო მიზეზის არსებობისას. სისხლის სამართლის საპროცესო კოდექსი საპატიო მიზეზს შემდეგნაირად განმარტავს: „საპატიო მიზეზი ☐ სისხლის სამართლის პროცესის მონაწილის გამოუცხადებლობა, რაც გამოწვეულია მისი ავადმყოფობით, ახლო ნათესავის გარდაცვალებით, სხვა განსაკუთრებული ობიექტური გარემოებებით, რომლებიც მისგან დამოუკიდებელი მიზეზით შეუძლებელს ხდის პროცესზე გამოცხადებას“.

ბრალდების მხარის მიერ მოყვანილი გარემოება ვერ ჩაითვლება საპატიო მიზეზად, რამდენადაც ბათუმში მივლინება სხდომის თარიღის პარალელურად არ წარმოადგენს ბრალდების მხარისგან დამოუკიდებელ ობიექტურ გარემოებას, რომელიც სხდომაზე დასწრების შესაძლებლობას გამორიცხავს. ამასთან, აღსანიშნავია, რომ სახელმწიფო ბრალდებას ამ საქმეზე ახორციელებდა ოთხი პროკურორი და ობიექტური დამკვირვებლისთვის ნაკლებად დამაჯერებელია, რომ მათ შორის ვერც ერთმა პროკურორმა მოახერხა პროცესზე სახელმწიფო ბრალდების უზრუნველყოფა.

მეორე მხრივ, კანონის თანახმად, ამ ტიპის შუამდგომლობის განხილვას არ აბრკოლებს მხარის გამოუცხადებლობა, რაც ნიშნავს იმას, რომ მოსამართლე უფლებამოსილი იყო არ გადაედო სხდომა და ბრალდების მხარის გამოუცხადებლობის მიუხედავად განეხილა შუამდგომლობა, რამდენადაც საქმის გადადების მოთხოვნა იყო უსაფუძვლო, ხოლო საქმის დროულად განხილვის ინტერესი - მაღალი როგორც დაცვის მხარის, ისე საზოგადოებისთვის (განსაკუთრებით იმ ვითარებაში, როდესაც საკონსტიტუციო სასამართლომ არაკონსტიტუციურად ცნო კანონის ის ნორმა, რომლის საფუძველზეც მოხდა პირდაპირი არჩევნებით არჩეული დედაქალაქის მერის თანამდებობიდან გადაყენება).

საია მიუთითებს, რომ მსგავსი მოტივებით პროკურატურის მიერ საქმის განხილვის დაუსაბუთებლად გაჭიანურება სხვა გახმაურებულ სისხლის სამართლის საქმეზეც

საქართველოს ახალგაზრდა იურისტთა ასოციაცია GEORGIAN YOUNG LAWYERS' ASSOCIATION



დაფიქსირდა - ბაჩანა ახალაიას მიმართ 2013 წელს ასევე დაუსაბუთებლად გაჭიანურდა საქმის განხილვა - პროკურატურამ თანმიმდევრობით რამდენიმე სხდომაზე ვერ უზრუნველყო სახელმწიფო ბრალმძებლის წარმოდგენა, ხოლო მიზეზი ისეთივე ნაკლებად დამატერებელი იყო, როგორც მოცემულ შემთხვევაში (პროკურორის ჯანმრთელობის მდგომარეობა, რომლის შესახებ სამედიცინო ცნობა არ იყო პროცესზე წარმოდგენილი და სხვა პროკურორის მიერ საქმის გაცნობის მოტივით სხდომის არაერთხელ გადადების მოთხოვნა).

„პროკურატურის შესახებ კონის“ მე-4 მუხლის თანახმად, პროკურატურის საქმიანობის პრინციპებია: „კანონიერება; ობიექტურობა და მიუკერძოებლობა; პოლიტიკური ნეიტრალიტეტი“. საია მოუწოდებს პროკურატურას, როგორც მოცემულ, ისე ნებისმიერ სხვა სისხლის სამართლის საქმეში არ გამოიყენოს გემოაღნიშნული პრაქტიკა და თავი აარიდოს საქმის ხელოვნურ გაჭიანურებას, რამდენადაც იგი აზიანებს როგორც კერძო ისე საჯარო ინტერესს, აჩენს კითხვებს სავარაოდო პოლიტიკური მოტივებით მოქმედების შესახებ, რაც ჩრდილს აყენებს ამ უმნიშვნელოვანესი სამართალდამცავი ორგანოს იმიჯს.